

■ COLUMNA

Mes profil

DA BRUNO BLOGG

Ussa sun jau tuttina sa decidì da publicitar mes profil. Betg forsa profils da construcziun. Mes profil persunal hai jau publicità en ina bursa da contacts en la rait. I appartegn ad in desideri fundamental uman da na passentar la vita persul, mabain en regla, da cuminanza cun tshella schlattaina. Malgrà mias experiencias sorprendentas areguard duas letgs separadas. Jau sun pront e grazia a tschertas experiencias da vita pront da sa meglierar. La rait augmenta considerabel la schanza da chattar la dunna da la vita. Ed jau sun definitiv un fis da spasegiar persul cun il chaun. Sper mias qualitads opticas e scharmantas che sa chattan enzanua tranter George Cloony e Hugh Grant sun jau sa concentrà d'affirmar mias habilitads communicativas. Sin forums sco «e-Darling» ni «Elite, academicher mit niveau». Sun bain betg academicher, ma tuttina hai jau profilà mia prontadad da sa profundar

e discutir diversas tematicas da la convivenza umana e da sa fatschentar cun ils desideris e basegns dad ina eventuala nova partenaria. Speranza nun han mias anteriuras partenarias betg access a mes profil. En scadin cas vegnan las bleras novas relaziuns instradadas en la rait sco jau hai intervegnì da mes figl. El ha la finfinala intimà mai al pass en la publicitad virtuala. «Bab, ti ed il chaun, quai n'ha betg perspectiva.»

Dacurt, sin ina da mias numerusas spasegiadas cun mes chaun, sun jau daventà, senza vulair, perditga dad ina finiziun andetga dad ina relaziun. Enten passar sper in clavà hai jau dudì ina ferma vusch gritta dad ina giuvna. «Idiot... egoist... sulet tes agens interess en il chau... mai peda per mai... cuigliunader... va en pigna...». La porta è s'averta andetgamain e la giuvna ha guardà a mi tut a grad en cun in'egliada tant trista sco ravgentada. Suentar ella è suandà in giuvenil cun

uschia ina da quellas capuzas dal pullover sur il chau giu. El è stà surprì da mia preschientscha. Stauscha enavos sia capuza e suspirà...: «Ah quellas femnas...». E sco da s'exculpar per la scena dadens la porta di el vinavant: «Ella vuleva adina tschantschar... adina puspè tschantschar. Jau na pos betg adina discurren. Ella vuleva bler da mai, fitg bler... jau hai ditg suenter quatter onns ch'i saja finì... Jau hai dapi duas emnas ina nova amia...».

A mai ha quella scuntra da fatg impressiun. Principalmain pervia da la savida fundamentala da quel giuven um davart ils vers basegns masculins. Turnads a chasa hai jau immediat midà mes profil pertutgant la comunicaziun. Insatge hai jau tuttina emblidà da dumandar il giuvenil. Daco ch'el è sa decidì per il clavà per far fin a sia relaziun. Quai fa la pareta dad in zichel romantica fallada. Mes figl ha ditg ch'ins fetschia quai ozendi per SMS.